



Svečana promocija diplomanata i magistranata Univerziteta u Sarajevu
13. decembar 2022. godine

Obraćanje prof. dr. Rifata Škrijelja, rektora Univerziteta u Sarajevu

Poštovana ministrica za nauku, visoko obrazovanje i mlade Kantona Sarajevo, prof.dr. Nikolić,
Poštovani dogradonačelnice, gospodine Bašić,
Poštovani predsjedniče Upravnog odbora Univerziteta u Sarajevu, prof. dr. Ramadanović,
Poštovani članovi Upravnog odbora Univerziteta u Sarajevu,
Poštovani prorektori i prorektorice,
Poštovani dekani i dekanice,
Poštovani diplomanti i magistranti, dobitnici i dobitnice priznanja Univerziteta u Sarajevu,
Poštovani roditelji, rodbino i prijatelji naših diplomanata i magistranata,
Poštovani predstavnici medija i gledaoci TV Sarajevo koja direktno prenosi ovu svečanost,
Dame i gospodo,

Želim vam iskrenu i srdačnu dobrodošlicu na Svečanu promociju koja predstavlja najznačajniju manifestaciju koju organizujemo u povodu naših decembarskih dana kada obilježavamo godišnjicu osnivanja Univerziteta u Sarajevu. U odnosu na prošlogodišnju promociju, raduje me što širimo format u kojem se okupljamo, te danas ovdje mogu pozdraviti više od dvije stotine diplomanata i magistranata koji su ujedno dobitnici i dobitnice priznanja Univerziteta u Sarajevu – povelje Univerziteta, srebrene i zlatne značke, kao i njihove poštovane roditelje, rodbinu i prijatelje.

Dojučerašnje pandemijske okolnosti zamijenjene su jednako teškom situacijom u kojoj ponovo svjedočimo ratnim slikama i ljudskim patnjama koje su duboko urezane u naše sjećanje. Zajedno sa ostatkom svijeta, svakodnevno se suočavamo i strepimo od posljedica dešavanja u Ukrajini, a i na Balkanu se suočavamo sa previranjima koja predstavljaju prijetnju miru. Bez obzira na ovaj kontekst, Univerzitet u Sarajevu radi i razvija se u nastojanju da opravda svoju ulogu visokoobrazovne institucije koja je neodvojivi dio savremenog bosanskohercegovačkog društva i države.

Upravo zbog toga značajna je i današnja promocija kada našem društvu i državi predstavljamo 201og dobitnika i dobitnicu zlatnih i srebrenih znački i univerzitetskih povelja, kao najbolje diplomante i magistrante od ukupno njih 4102-je kojima će diplome biti uručene u toku decembra na fakultetima i akademijama Univerziteta u Sarajevu. Ovo je jedinstvena prilika da vama, mladim ljudima koji su ostvarili izuzetan akademski uspjeh, u prisustvu vaših roditelja, rodbine u prijatelja, uputim iskrene čestitke i izrazim želje koje su namijenjene najprije vama, ali i cijeloj akademskoj zajednici Univerziteta u Sarajevu.

Želim da svoje dalje životno i akademsko djeovanje u što je većoj mogućoj mjeri vežete uz Univerzitet u Sarajevu. Da bi vas u ovom smislu ohrabрили, sa naše strane, zajedno sa našim partnerima iz institucija vlasti, ali i poslovnog i civilnog sektora, poduzeli smo brojne reformske korake, a priroda ovog obraćanja dozvoljava da samo spomenem uvođenje nekoliko desetina novih studijskih programa i inoviranje postojećih, provođenje koncepta integrisanog, ali decentralizovanog Univerziteta, usvajanje novog Zakona o visokom obrazovanju, nastavak

informatizacije i internacionalizacije, jačanje naučno-istraživačke infrastrukture, mehanizama za zaštitu i promociju rodne ravnopravnosti, osiguravanje institucionalne podrške za podmlađivanje nastavnog kadra, itd.

Vjerujem da će generacija koju promoviramo ove godine u punom kapacitetu koristiti rezultate naših kapitalnih ulaganja u infrastrukturu, poput Univerzitetske biblioteke, gdje nas ovih dana očekuje i potpisivanje ugovora sa izvođačem radova, kao i novog najmodernijeg Kampusa u regiji čiji master plan je u izradi i omogućiće pristupanje finansijskim aranžmanima Evropske unije, neophodnim za njegovu izgradnju. Uvjeran sam da će vaše znanje, vještine i ambicije biti sastavnim dijelom ovog novog uzbudljivog perioda u razvoju Univerziteta koji nam tek predstoji.

Želim vam da u svom akademskom i profesionalnom radu i djelovanju uvijek budete pobornici pune autonomije Univerziteta u Sarajevu i akademskih sloboda jer samo autonoman i slobodan univerzitet može biti predvodnik općeg društvenog napretka. Ovo podrazumijeva i vašu osobnu slobodu, stalni razvoj i stremljenje ka izvrsnosti, posvećenost naučnoj spoznaji i njenoj primjeni u praksi, te vaš osobni doprinos održavanju zdrave i poticajne akademske atmosfere.

Uvjeran sam u uspjeh vaših akademskih i profesionalnih nastojanja, jer ste snažna generacija, koja je unatoč brojnim izazovima, pa i stranputicama, koje sa sobom nosi savremena višedimenzionalna realnost, ostali posvećeni nadprosječnom akademskom postignuću kojem danas ovdje svjedočimo. To je vaš uspjeh na kojem vam čestitam, ali i uspjeh vaših najmilijih i najbližih, čiju podršku uživate i kojima se takođe zahvaljujem na svim odricanjima i žrtvama. Budite ponosni na ono što ste postigli i vjerujte da ćete postići još više.

Dragi diplomanti i magistranti,

Prije nekoliko dana, obilježavajući 73-u godišnjicu Univerziteta, u Vijećnici, podsjetio sam da je upravo 1949. godine, u Vijećnici održana prva Univerzitetska skupština Univerziteta u Sarajevu, a za prvog rektora izabran dr. Vaso Butozan.

U ozračju koje je bilo obilježeno zajedništvom i antifašizmom, koje je možda bez presedana u našoj savremenoj povijesti, uspostavljena je univerzitetska institucija koja je u samim temeljima savremene bosanskohercegovačke države i društvene zajednice. Stoga zaključujem svoje obraćanje vama sa željom da i vi, danas više nego ikad, ostanete posvećeni ideji zajedništva među ljudima i narodima i vođeni antifašističkim vrijednostima i tekovinama. Univerzitet u Sarajevu i vi, kao njegova najveća vrijednost, vođeni progresivnim idejama, zajedno možete dati nemjerljiv doprinos izgradnji Bosne i Hercegovine kao države i društva koje će okupljati, ujedinjavati i dalje razvijati sve svoje potencijale.

Poruka političarima i međunarodnim zvaničnicima u Bosni i Hercegovini. Političarima poručujem da svoju ratnohuškačku retoriku zamijene ukidanjem moratorija na zapošljavanje mladih ljudi na svim nivoima vlasti i realnom sektoru u Bosni i Hercegovini. Nije logično da se u svakoj predizbornoj kampanji čuju poruke „zaustavićemo odlazak mladih iz zemlje“, a odmah nakon izbora vlade donose moratorije na zapošljavanje. Postavlja se pitanje kako zadržati mlade ako im ne otvaramo radna mjesta i ne zapošljavamo ih. Poruka Vladi Kantona Sarajevo. Kao Univerzitet u Sarajevu tražimo zapošljavanje 150 asistenata jer smo to zadnji put uradili 2018. godine, a za proteklih četiri godine zbog odlaska u mirovinu i zbog drugih razloga ostali smo bez 300 članova i članica naše akademske zajednice. Mladost nosi prosperitet i radost i to želimo imati na Univerzitetu u Sarajevu.

Poruka međunarodnim zvaničnicima. Kao rektor najvećeg i najstarijeg univerziteta u Bosni i Hercegovini u najsvečanijem danu u decembru ove godine pozivam sve zvaničnike

međunarodne zajednice i diplomatskog kora u Bosni i Hercegovini da čašću i funkcijom koja im je povjerena profesionalno, objektivno i bez navijačkih manira u odnosu na bosanskohercegovačke političke koncepte istinski stanu uz građane i građanke ove zemlje, sankcionišu sve one koji govorom mržnje tjeraju mlade iz ove zemlje. Naši svršeni studenti i studentice ne žele da idu u rovove, a onda u grobove, već žele da rade u sigurnom okruženju, formiraju svoje porodice i žive u slobodi.

Hvala!